

N muie de projec e atività per Lifeline Dolomites

La sociazion vidèda da Claudio Merighi à prejentà l bilanz e i intervenc porté inant tel Zimbabwe, ma ence te Romania, Senegal e etres lesc olache l'é de besegn



L dr Carlo Spagnolli e l dr Michele Conti con medizi e personèl sanità del Zimbabwe che à tout pèrt al cors chirurgich su l'idrocefalo.

Solidarietà - Desche ogne an i sozi de la sociazion Lifeline Dolomites i se à binà per la radunanza ordenèra, per portèr dant l'atività fata via per l 2010, aproèr l bilanz consuntif, ilustrèr l program per l 2011, renovèr la encèries sozièles del diretif.

L president Claudio Merighi à metù al luster l'atività che à caraterisà l 2010, che à vedù l'empegn costant da pèrt de duc i voluntadives prum de dut per ge arseguèr l sostegn logistich, sanità e alimentèr ai projec del dottor Carlo Spagnolli tel Zimbabwe.

Enceben che colpi tel fon del cher da la manconia per la mort de sia femena Angelina, de firé del 2010, l dottor Spagnolli à seghità a se dedichèr a sia miscion a pro de malé e purec. Per l sostegnir via per l 2010 l'é stat manà 5 containers de aiuc umanitères tel Zimbabwe, con ite estra che medejines ence atrezatures sanitàres, magnadiva, materièl per la netjia, aparac e impianc fotovoltaics, generatores de corente e amò n muie de auter.

Chesta atività emportanta la é stata possibola de gra se sà ben a la desponibilità di voluntadives ma ence de gra a l'intervent de la Provincia autonoma de Trent che, travers l'Assessorat a la Solidarietà Internazionèla, l'à finanzià l projet per l 2010 "Invio container di sopravvivenza in Zimbabwe". Fondamentèla l'é stat ence la colaborazion de firmes, Enc e privac de Fascia e Fiem che con cher dàtol à sostegnù economicamenter la scomenzadiva. De gran segnificat l'é stat ence la fona colaborazion con l Comitad de la Crousc Chécena de Fascia en ocasion de la regoeta de magnadiva endrezèda adum via per de mé te duta la boteighes de Fiem e Fascia a favor del Zimbabwe e del Zenter Bec en Emergenza de Singureni te la Romania. L'é stat binà passa 50 quintai de magnadiva.

Tel meis de aost desche zenza l'é stat endrezà la Festa de la Fradaa e de la Solidarietà te la val de S. Nicolò, ruèda a la 11^a edizion, na bela ocasion per l dottor Spagnolli de scontrèr amisc e sostegnidores, passa 400 chest an.

Per l terz an de séghit se à concretisà l'aiut al Seminarie "Notre Dame" de Ziguinchor tel Senegal,

president Merighi l'é jit tel Zimbabwe tant per l montaje di impianc fotovoltaics e de la pompes a energia del soreie che per didèr l dottor Spagnolli a dèr fora i aiuc umanitères ti desvalives zentres de assistenza.

Da segnalèr ence la scomenzadiva de solidarietà a favor de Lifeline Dolomites portèda inant dal Comitad Manifestazions del comun de Poza. En ocasion de più manifestazions defat l'é stat regoet contribuc per la ativitàdes del dottor Spagnolli.

Del 2010 ence l projet "Adozions da dalonc de bec orfegn" à vedù crescer apontin la adozions de bec del Zimbabwe: 57 l'é stat i bec adoté, de chisc 31 a Chinhoyi e 26 a Kariba.

Su envit de l'assessor provinzièl a la solidarietà Lia Beltrami Giovanazzi Lifeline Dolomites à dat sia desponibilità a realisèr doi projec finanzié da la Pat a favor del Zenter Bec en Emergenza de Singureni te la Romania, zenter metù sù acà 15 egn dal giornalista Mino Damato, che ge dèsc alberch a bec arbandoné percheche malé o sieropositives. Tel chèder de chisc doi projec l'é stat menà colavia magnadiva estra che materièl sanitàres e logistich e enscinamai n pulmin Fiat Ducato béleche nef. L'é da dir che tor pèrt a chesta scomenzadives à dat l met de ruèr en contat amò n'outa con realtèdes tragiches, che nos chiò massa de spes desmension: picoi bec arbandoné che te chel zenter à podù troèr n pont de referiment segur, con l'amor e la dedizion de la monies e de dut l personal.

Per sturtèr l'an te la vida miora, la dì de Nadèl Radio Dolomiti à endrezà na vendita a l'encant de benefienza che à abù dassen bon éjit. Per poder portèr inant azions percantes de solidarietà la sociazion conscidra de gran ütöl la colaborazion con la outra sociazions de voluntariat, tant per se baratèr idees che per se didèr te la ativitàdes de regoeta de aiuc umanitères; a chest propòjit Lifeline Dolomites met a la leta de la outra sociazions sia esperienza, si mesi e dut chel che amò pel servir per ge dèr sostegn a chi che pel aer besegn de n aiut concret tant chiò che stroz per l mond. L president Merighi l'à amò ilustrà l bilanz consuntif 2010 che

Zimbabwe e l dottor Spagnolli ence col didament de la Pat; l sostegn al projet "Casa di Renato" col finanziament del grop de Pagnano; la regoeta de èrc e aparac per realisèr na tislèra te l'Ospedèl Guidotti de Mutoko; la spedizione de n container de materièl sanitàr te l'Uganda, te l'ospedèl fat sù en recort de Angelina, la femena del dottor Spagnolli; la Festa te la val de S. Nicolò; la vendita a l'encant da Nadèl e amò de auter.

Anter la ùltima novitàdes metudes en consaputa dal dr Spagnolli l'é da sotlineèr l gran éjit abù dal cors chirurgich su l'idrocefalo con l neurochirurg dr. Michele Conti, a chel che à tout pèrt 11 medizi, 4 anestesisc e 4 componenc del staff de la sala oratoria del Zimbabwe. L cors à revardà na sort de intervenc al cef (idrocefalo e mielomeningocele) che ge à permetù ai picioi de vegnir libré da la compresion al cervel per poder mingol a l'outa esser endò segn e fergusoi.

Per chel che revèrda l renovament de la encèries sozièles, la litazion à dat chest resultat: president Claudio Merighi, vize Barbara Pedrotti, conseieres Sara Merighi, Lino Detomas e Simone Calligari.

Per fenir, la radunanza à deliberà a una de fissèr a 50 euro la quota de enscinuazion a la sociazion e a 10 euro la quota anuèla de renovament.

